

## **Dithero tsa Tirelano mo Kutlwanong**

57/2015 Thero ka letsatsi la tlhabologo le thapelo ka moletlo wa ntšhwafatso ya kereke, e le ka 18. 18. 11. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang letsatsi le, le kwadilwe mo go Diane 14:34, le re: “Tshiamo e godisa setšhaba, mme boleo ke ditlhong tsa merafe.”

1. Sefela sa 164 -146/149

2. Thapelo: Morena, re a kopa gore o re abele Lefoko, jaaka re go kopa gore o re fe sejo sa letsatsi. Re kopa Lefoko la gago gore le re tsoseletse, le go re fetola, le re gogele go tlhabologela mo go wena le mo ditsholofetsong tsa gago tse di re gololang. Re a kopa gore re se kgopisege, fa le re tlhaba, mme le re itumedise, gonne ke le le re tlisetsang lorato lwa gago lwa go re rata, rona ba re leng baleofi, e le lorato lo lo sa solofologeng ka ntlha ya rona, mme lo lo re tlhabolole gore re kgone go tswa, gongwe go bowa mo ditseleng tse re timeletseng mo go tsona, e le tse di isang losong, tse di bidiwang “cul-de-sak” ka Seesimane, gongwe “doodloopstraat” ka Seburu. Ke gona re kopang gore o re abele Mowa o o Boitshepo go ikwatlhaela ruri, le go tlhabologa. Re kopa tse tsotlhe tseo mo leineng la ga Jesu. Amen.

3. Lefoko la Testamente e kgologolo le kwadilwe mo go Jesaya 1:10-17;  
Epistolo ka fa thulaganyong ya 2 e kwadilwe mo go Baroma 2:1-11;  
Efangele ka fa thulaganyong ya 3 e kwadilwe mo go Matheo 12:33-37.

4. A go ipolelwe tumelo ya bokeresete!

5. Sefela sa 176 - 159/166

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Luka 13:1-9, e re: "Go ne go le bangwe teng ka yona nako eo, ba mmegela ka ga Bagalelea ba Pilato o tlhakantseng madi a bone le ditlhabelo tsa bone. Jesu a ba araba, a re: A lo itlhome gore Bagalelea bao e ne e le baleofi go feta Bagalelea botlhe, ka ba bolailwe jalo? Ke lo raya ke re: Nyaya, mme fa lo sa sokologe, le lona lo tla nyelela jalo lotlhe. Gongwe ba ba 18 ba turio e ba wetseng kwa Siloame, ya ba bolaya, a lo itlhome gore ba ne ba le molato go feta batho botlhe ba ba agileng mo Jerusalema? Ke lo raya ke re: Nyaya; mme fa lo sa sokologe, le lona lo tla nyelela fela jalo lotlhe. A ba a bua ka setshwantsho se se reng: ‘Motho mongwe o ne a na le mofeie, a tlhomilwe mo tshimong ya gagwe ya moweine. Jaanong a tla a batla maungo mo go ona, mme a a tlhoka. A raya molemi wa tshimo a re: ‘Bona ke dinyaga tse tharo, ke ntse ke tla ke batla maungo mo mofeieng o, mme ke a tlhoka. O reme! O jelang lefatshe fela?’ Ene a

mo araba a re: ‘Morena, o lese le ka ngwaga ono, ke tla ke o lemele, ke tsenye letshotelo. Motlhaope o tla ungwa isago; fa go sa nne jalo, o ka o rema.’ Amen.

{Pele re ise re utlwe thero e e kwadilweng, a re tlhokomeleng gore Jesu o re senolela molao wa Modimo ka go boelela mafoko a a reng: “fa lo sa sokologe, le lona lo tla nyelela jalo lotlhe.” Le ka mafoko a setshwantsho sa mofeie a morena wa moweine a a buang a re: “O reme! O jelang lefatshe fela?” le ka mafoko a molemi a moweine a a reng: Fa o sa ungwe jalo, “o ka o rema.” Ka mafoko ao go senolwa molao wa Modimo. Ka mafoko a molemi wa moweine go umakiwa mo setshwantshong go tshwantshiwa ka thanolo e kgolo Efangele ya ga Jesu Keresete, jaaka re utlwa mo therong.}

8. Thero: Phuthego e e rategang, mo ditumelong tse di tlhagang mo tlhagong ya batho go fitlhelwa ditiriso tse di bidiwang tsa go ikgogela mo boikwatlhaong, e le ditlwaelo tse batho ba ikaelelang go iponela meputso fa pele ga Modimo ka ditiro tse di kaiwang tse dikgolo tsa mmele le tsa mowa. Foo ga tlhagisiwa ke “baikwatlhai ba ba ntseng jalo” tse di gakgamatsang ka go leka go rulaganya botshelo jwa bone fa pele ga Modimo. Ka fa molaetseng wa Beibele re tshwanetse go tlhoma, fa go sa tlhobololwa sepe ka matsapa ao mo dikakanyong le mo botshelong jwa bone. Martin Luther o ne a ganetsa diteko tse di ntseng jalo tsa go itirela boikwatlhao, jaaka go bonala mo polelong ya 1 ya gagwe ya dipolelo tse di 95 ka ga ditiesetso ka kgwedi ya Phalane, e tlhotse matsatsi a a 31, tse di kaiwang tshimologo ya bontšhwafatso jwa kereke. Polelo ya 1 eo e re: Ka lefoko la ga Keresete e e reng: “Tlhabologang! Morena le Moruti wa rona o a rata gore botshelo jotlhe jwa badumedi e nne tlhabologo.” Martin Luther o ne a rata go busetsa kereke mo molaetseng wa boitumelo jwa ga Jesu Keresete, gore e kgaogane le tiriso ya boikwatlhao le mo timetsong ya thekiso ya ditiesetso, go ba busetsa mo boitumelong jwa tlhabologo ka fa motheologi mongwe, e bong Julius Schniewind, a kileng a supa ka leina la lokwalo longwe lwa gagwe, fa go tlhabologela mo Modimong go itumedisisa ka boitumelo jo bogolo botlhe ba ba tlhabologang, gonne mo tlhabologong modumedi ga a kopane le Modimo o o atlholang, mme o kopana le Modimo yo e leng Mogolodi. Jesu Keresete ka nosi o buile ka thanolo, a re: baengele mo legodimong ba tla bina le go opela, ba itumelele moleofi mongwe le mongwe yo o sokologelang mo Modimong le mo botshelong jwa nnete.

Ka ditshwantsho tsa nku, le selefera, le morwao yo o latlhegileng Morena Jesu o tshwantshitse ka mafoko le ditshwantsho ka fa tlhabologang e tumedisang ka teng. Go ikgethela ditsela tse di maswe le boithato di gogetse morwa yole mo go “doodloopstraat” mo tseleng e e isang tatlhegong, mo losong, mo kगतipping, mo botennye jwa tatlhego. Go tla diragala gore molatlhegi a tswe mo go “doodloopstraat” fela, fa a tlhobologa, a boele kwa a kileng a tsena mo tseleng eo teng. Motho yo o tsentseng tlhogo ya gagwe mo kgetsing, o tla kgona go tswa mo go yona, fa a e ntsha mo molomong

wa kgetsi o a e tsentseng ka ona. Ntle le go tlabologa, le go boela mo go Rraagwe go retetse, go ka bo go paletswe ditsela go phologa mo kotsing e a itsentseng mo go yona, a kgona go phologa ka go itse gore o tla amogelwa ka fa tlase ga ditlhomiso tsa ntlo ya ga rraagwe, ke gona a ipoletseng a re: “Ke tla nanoga ke ya kwa go rre, ke mo raya ke re: Rra, ke leofetse legodimo le wena; ga ke tlhole ke tshwanela go bidiwa morwao; ntire jaaka mongwe wa batlhanka ba gago.” O ne a ipolela molato wa gagwe, le go kopa go amogelwa ke rraagwe.

Go batlega go itemoga gore ke ntse ke boela mo ditseleng tse di isang losong, mo go “doodloopstrate.” Ke tla kgona go tswa mo go tsona ka go tlabologa. Diteko tse dingwe di tla bo di sa thuse. Tlabologo e e ntseng jalo e e batlegang ke go tlabologela mo go Rara yo o mo legodimong ka go ikanya Morwa Modimo Jesu Keresete. Boikanyego jwa tlabologo e e ntseng jalo go bonala ka thapelo ya boipobolo e e reng: “Rara, ke go leofetse ka go ikgethela boithato, le go itsenya ditseleng tse di isang losong. Ke fositse, ka timela mo go maswe. Mo tshimologong ya go dira mo ponatshegong kwa Galelea Jesu o ne a rera, a re: “Sebaka se weditse, puso ya Modimo e atametse. Tlabologang lo dumele Efangele!” Mark. 1:15. Efangele mo lefokong la thero ya kajeno e supediwa, le go bonala mo thapelelong ya ga Jesu gore Modimo a utlwele ene botlhoko yo o neng a sa ungwe maungo a tlabologo, pele a ise a atlholelwe ka bogale. Jesu o rata go dira tsotlhe tse di umakiwang ka setshwantsho sa tiro ya molemi wa tshimo, fa a rata go lemela mofeie, le go tsenya letshotelo. Keresete o ikaelela go thusa moleofi gore a ipone molato, a tlabologe le go amogela go gololwa ka boitshwarelo ka sebaka sa bopelotlhomogi. Mo sebakeng sa thobo Modimo o tla patelediwa go dira se se utlwisang botlhoko. Tse di tlabelang moleofi, gongwe go utlwiwa botlhoko ka tse dingwe di tla mo thusa go ungwa maungo a maswa. Gantsi re lemogsa fela, fa go ntse jalo, tse di botlhoko di sena go re diragalela. Fela a re gopoleng gore Modimo ga o rate go duela maleo a a rileng ka tse di botlhoko, ka dikotsi gongwe ka namane e kgolo ya tshenyegelo, mme o rata go biletsa batho botlhe mo tlabologong ka fa lereong le le reng: O tshela kajeno. Tlabologa kajeno! Gongwe ka fa lefokong le le reng: “e ke te lo ka bo lo utlwa lentswe la gagwe kajeno! ‘Se thatafatseng dipelo tsa lona!’” Sebaka sa bopelotlhomogi se ka fetolwa ka tshoganyetso fela mo botshelong jwa motho Sebaka sa bopelotlhomogi se dirisiwa ka tshwanelo fela ke motho yo o boelang mo ntlong ya ga Rara. Sebaka sa bopelotlhomogi se ka fela. Dintsho tse dintsi mo dintweng, gongwe ka nako ya namane e kgolo ya tshenyegelo le mo dikotsing tse di utlwisang botlhoko thata di supa gantsi, fa sebaka sa bopelotlhomogi se sa nnele ruri.

Mafoko le ditiro tsa motho di tsamaelana, le fa e le mo go tse di molemo, gongwe mo go tse di bosula. Go ntse fela jalo mo setlhareng le maungo a sona. Maungo a supa gore ke maungo a setlhare se se ntseng jang. Gape tsholofelo e teng, fa o itse mofuta wa setlhare gore se tla ungwa maungo a a ntseng jang. Fela jalo mafoko le ditiro tsa rona di a tsamaelana. Mafoko a a maswe, maaka, ditshebo ga di diragale fela. Di senyetsa batho maina. Di bonala, fa di ungwa maungo a a bosula, jaaka go opelwa gore “boleo ke noga e e tsalang bana.” Go bonala fela jalo, fa ke rata ka lorato lwa Modimo, lorato lo tla fetela mo go mokaulengwe. Go na le se sengwe se se bonalang ka mafoko a rona, fa e le mafoko a a lolea, fa mafoko a sa re sepe. Go diragala, fa mafoko a rona a sa latelwe ke ditiro. Ka tseo ke gopola moperesiti le Molefi bale ba ba fetileng fela mo go yo o utlwisitsweng botlhoko mo go maswe fa gare ga Jerusalema le Jerigo. Go a amogelesega, fa ka bobedi jwa bone ba buile tse dintsi ka ga go thusa batlaledwi ka lorato, mme ba ne ba feta fela mo go yole, ba sa mo thuse ka lorato mo tlalelong ya gagwe. Thuso eo e dirafaditswe ke Mosamaria yo o neng a nyadiwa ke Bajuda, le baperesiti le Balefi. Go bonala le ka setshwantsho sa mofarisai le mokgethisi. Jesu o supa ka dithapelo tsa bone, fa mafoko le ditiro tsa bone di ne di tsamaelana. Ke se se itumedisang, fa mofarisai a buile ka ga tse di molemo tse a di dirileng, mme bosula jwa gagwe jwa bonala ka go nyatsa mokgethisi, a gopola gore mokgethisi e ne e le moleofi yo mogolo. Mme ka go nyatsa o ne a leka go mo tswalela mo dikakanyong tsa gagwe phatlha ya go amogelwa ka boutlwelebolhoko jwa Modimo. Mokgethisi o ne a a bua nnete, fa a ne a ipolela, a re: “Nkutlwele botlhoko, nna moleofi!” O buile nnete. Kana batho botlhe ba tsetswe e le baleofi.

Go na le mofuta wa poifo-Modimo ka fa molaong o o ka reng o tshela ka ditimelo tsa ba bangwe, ba di dirisa ka seiponi se se ba phatsimisang gore ba ikaye, le go kaiwa basiami ke batho, mofarisai a re: “Modimo, ke a go leboga, ka ke sa tshwane le batho ba bangwe” Go molemo, fa a leboga Modimo, fa a femetswe mo dithaelong tse dintsti. Mme fela, fa a ka bo a dirile jaaka mokgethisi yo o ikwatlhaileng, o ka bo le ene a fologetse mo ntlong ya gagwe a siamisitswe ka go amogelwa mo kagisong ka ntlha ya boitshwarelo jwa Modimo. Mme mo boemong jwa go amogelwa o ne a latlhwa. Go na le mabaka a le mantsi gore re leboge Modimo, fa o re femela gore re se ka ra wela mo dikgatamping tse di boteng teng, mme fa o re tshegofaditse ka tse dintsi mo botshelong jwa rona. Go batlega tota gore mafoko a rona le ditiro tsa rona di laolwe ke Mowa o o Boitshepo ka pelo e e ratang. Kana ke Modimo o le osi o e leng Moatlhodi wa rona, le wa ba bangwe, o o tlhoafetseng go beletsang bana tshiamololo ya borraabo go ya losikeng lwa boraro le lwa bone, lwa bona ba ba o tlhoang, ba ba tlolang ditaolo tsa ona, mme ba le dikete ba ba o ratang le go tshegetsisa ditaolo tsa ona, o ba direla ka bopelotlhomogi, e le o o ratang gore baleofi botlhe ba tllhabologe, ba dumele gore ba itshwarelwe

maleo a bone ka go dumela mo go Jesu Keresete, ba amogele boitshwarelo, kgololo mo losong, le botshelo jo bo sa khutleng mo kolobetsong, boitshwerelo mo leineng la Modimo o e leng Rara le Morwa le Mowa o o Boitshepo mo boipobolong, le boitshwarelo, pholoso le botshelo jo bo sa khutleng ka go ja mmele wa ga Keresete le go nwa madi a gagwe mo selalelong sa Morena Jesu Keresete.

Kwa lefoko la Modimo le buang teng ka ga maungo a tumelo a Morena Keresete a ratang go a kotula go rewa lorato, boitumelo, bopelotelele, bopelontle, molemo, boikanyego, bonolo, boitshwaro, bophepa, le dilo tse di ntseng jalo. Ke tse di tla gakolosang sefako se se tsidifatsang ditirelano fa gare ga batho. Maungo ale a Mowa o o Boitshepo a tsweledisa kagisanyo le boikhutso fa gare ga batho, a feny a dikganetsanyo, a phimola dikeledi, a fodisa dintho, a aga, le go boloka botshelo, a tsala tsholofelo, le go bulela merafe sebaka se se tlang. Martin Luther ga a rate go re tlhotlheletsa go supa khutsafalo ka ntlha ya maleo mo difatlhegong tsa rona ka metlha, fa a raya, a re: “Botshelo jotlhe jwa mokeresete e nne tlihabologo e e nnelang ruri!” mme o bua ka ga dintlha tse pedi tsa tlihabologo, e bong boikwatlhao ka ntlha ya maleo a rona, le go dumela le go ikanya boitshwarelo jwa dibe ka ntlha ya ga Keresete jo bo tsalang boitumelo jo bo nnelang ruri. O a rata gore boitumelo joo bo bonale mo difatlhegong tsa badumedi ka metlha, gonne go tlhobologa go mmogo le boitumelo jwa go itumelela bopelontle, le bopelotlhomogi jwa Modimo ka go amogelwa mo kolobetsong e e boitshepo go nna ngwana wa Modimo le moruaboswa wa botshelo jo bo sa khutleng. Boitumelo joo bo ntšhwafadiwa ka metlha, fa re kopa ka go ikwatlhela maleo mo Modimong gore neo ya botshelo jo re bo baakanyeditsweng ke Keresete e tsene sešwa mo dipelong tsa rona. Gopolang gore maungo a leungo lele ke se se neng se tsena mo botshelong jwa rona, se tswa mo setlhareng sa botshelo se e leng Keresete. Ka ntlha ya maungo ao ga re na go akanya gore ke rona ba re nonofileng go a ungwa. Ka tebogo e kgolo re a ipolela, re re: “Ke nnete, ke ene, e bong Morena wa me yo o nonofileng go ungwisa tseo, e le yo o di ungwisitseng mo go nna. Jesu o emisa katlholo e e ntshwanetseng gore ke nne le nako go tlihabologa. Ke ene yo o lemelang fa thoko ga rona ka lorato le ka bopelotelele, o tshela mosutelo gore maungo ale a butswe sentle. Ke Efangele e e gololang ya Morena le Mopholosi. A leina la gagwe le le galalelang le bokwe! Amen.

9. Thapelo: Morena Jesu Keresete, o re etelela pele. Re letleletswe go go sala morago. Go tloga mo kolobetsong e e boitshepo e re kolobeditsweng ka yona botshelo jwa gago bo elela mo ditshikeng tsa me go ungwa maungo a tumelo mo botshelong jwa me. O re fe bopelotlelele le boitshoko mo tumelong gore re se ka ra ikgaoganya le lefoko la gago le le re tsoseletsang, le le le re gomotsang, le le atlholang, le le le gololang, le go thusa le go fodisa. O re thuse gore re tshele mo boikwatlhaong le mo

tlhabologong ka fa maikaelelong a gago. Re lebogela phatlha ya sebaka sa bopelotlhomogi, e o sa ntseng o e re abela ka lorato lo logolo lwa gago. Amen Thapelo ya Morena: Rara wa rona yo o mo legodimong ...

10. Sefela sa 186 - 172/179

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke F. A. Häfner ka ngwaga wa 2015.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.